

KUMPUNAN
RAM LEH HNAM
HUMHALH

YMA AW



CHANMARI WEST BRANCH YMA CHANCHINBU KAR TIN CHHUAH. VOL. XXIII. ISSUE NO.37 9th Sept., 2012

Lung lum vangin chhiatna thleng

Chanmari West, 9th Sept.: Ni 2.9.2012 (Pathianni) zing dar 6 pelh hret ah khan Chaltlang kham kawng ko chu a min a, footpath delh chhiain Chanmari West lamah lung lian tak tak chu a lum thla a, heng lum lum hian kan veng chhung in eng emaw zat a ti chhia a, nunna chan chu vanneih thlak takin an awm lo hlah a ni.

Lung lo lum thla hian Pu Rochharliana in chu a deng chhe nasa ber a, a sira UPC Biak In pawh a deng chhe nual baw a ni. Pu Lalbiakmawia Ralte in chung deng chhe leh bawkin, Pu Mosia in ban a deng tliak baw a ni. Athlang lama awm Pu Remsangpuia in pawh a deng chhe nual baw a, Pu T. Zorampela in bang hrut thla lehin Pu JH Pahlira (L) in kawtah lung lian tak chu a ding hram a ni.

He thil thleng hi hriat a nih veleh Minister Pu Nihar Kanti Chakma, Bialtu MLA Pu Lalthanzara leh official te chuan an tlawh nghal a, sawrkar pawhin a theih ang angin hma an la nghal a ni.

Ni 2.9.2012 tukthuan eikham khan kawngpuia lung chu PWD-in paih fai hna an thawk a, nileng pawhin an zo hman lova, a tukah an paih fai thei hram a ni. Veng chhungah pawh Pathianni khan hnatlan tan a ni a, Pu Rochharliana in atanga bungraw thiar theih theih chu thiar chhuah a ni. Thawhtanni atanga tunkar chhung zawng hian bawlhhlawh paih leh in chhiate siamthat hnatlang a ni thin a, hnatlang pawh an thahnem thei hle.

He chhiat tawh pual hian mi thahnemngai ten thil pek hrang hrang an pe a, veng chhung nu leh pa, nula leh tlangval ten siamthat hna an thawk a, heng mitechungah Branch YMA chuan lawmthu an sawi a ni.

Branch News

Chaltlang kawng atanga lung rawn lumthlain In a tihchhiatte tanpuina atan Rs 2000/-Disaster Committee-ah hlan a ni.

Tunkar chhunga mite tanpuina atana thawkchhuakte chungah lawmthu sawi a ni.

Inrinni kalta khan ZCC in veng chhung pawl hruaitute tana football hmanga inkhelh A.R Ground a an buatsaih chu hlim takin an khel.

Chanmari West Presbyterian Kohhranin Camping a neih a, lutte chu Kohhran leh khawtlang tana mi tha tak leh tangkai tak an nih chhoh zel kan beisei.

Central YMA in Inter Branch YMA Volleyball Tournament a buatsaih turah mipa team-te inbuatsaihna neih chhoh mek zel a ni.

Branch Executive Member Nl. R. Lalramengzami chu Mumbai-ah in check up-in a kal a, dam taka a lo haw leh thuai kan beisei.

Kan veng chhung lung lumin in a tihchhiat sak chu kan tawrhpu hle.

Kan Branch Vice President Pu R. Lalhmachhuana, Executive member Pu Thanseia leh Pu Lalrinlianate chu Campingah duty-in an lut.

NGENNA

Lung lumin In a tih chhiat avang a hnatlangah khan mahni hmanrua ni lo, lo hawn palh kan awm a nih chuan YMA hruaitute hnenah khawngaih a dah turin kan inngen e.



Chaltlang kham lung lumin a tihchhiat Pu Rochharliana In
Thlalatu : Tv. B. Lalsawmzuala (Sir Tea)

LAWMTHU SAWINA

Ni 2.9.2012 zinga Chaltlang kham atanga lung rawn lum thlain kan vengchhunga In a rawn tihchhiatte hnatlanga thawm that a nih chungchangah, hnatlanga thawk chhuakte leh tanpuina atana thilpek petute zawng zawng chungah Disaster Management Committee chuan lawmthu a sawi tak zet a. Tanpuina petute hi a remchan dan angin YMAAw ah rawn tarlan tum a ni.

Tin, tanpuina la pe duhte chuan engtik lai pawhin YMA, Local Council leh Disaster Management Committee hruaitute hnenah pek theih reng a ni e.



TUNKAR CHANGVAWN

“Uain hi nuizatzabura mi siamtu a ni a, Zupui hi insual bung bungna a ni;
Chu mi buma awmte chu an fing lo a ni.

Thufingte 20:1

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R. Lalrinngmeta	9862358337
	Jacob Lalrinsanga	9612319779
Cir.Manager :	Johny Lalthanpuia	9612359161
	EVL. Hruaitluanga	9862655426
Production Manager :	R.Lalmachhuana	9436151817

Branch Office Bearer

President	T. Ngurkhuma	9436190843
Vice President	R. Lalmachhuana	9436151817
Secretary	RL. Thanhnuana	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiangte	
	Pu Rothuama, Pi Zamanthangi	
	Pu Lalrengpuia Sailo	

Editorial :

Kan veng hmun tam zawk hi kham hmun awih tak a nih avangin, lung lum emaw leimin emaw tuar mai thei dinhmunah kan ding bik a ni. Tunhnaiah pawh lum lung kan tuar a, kan vanneih asiamin thihna em a thleng lo hlauh a, lawmawm tak a ni. Hetiang thleng thei lakah hian engtiangin nge kan veng hi kan inbuatsaih ang, mi thiam ten ngaihtuahna an sen a ngai ta a ni.

Kan Branch YMA hian chhياتni fund kan nei a, chu chu thihna kaihnawihah hman a ni thin a, chutih laiin heng chhياتna dangah pawh hian kan hmang thei tho bawk. Amaherawhchu, thihna thil ni lem lo chhياتna dang hrang hranga hman tur hi, a head hran siama kan kal angai niin alang. In chhia emaw thil dang hautak tham deuhah hmalak ngai ta se, kan hmalakna lian tham leh daih thei tur chuan sum kan khawl tam angai a, chutiang tur chuan kan inbuatsaih a va tha em. Chanmari West Branch YMA President relief fund-te siam ila, tah chuan a thei theiin sum leh pai chhung khawm ila, heta tang hian tanpui ngai leh tuam hlawm ngai apiang tanpuiin kan tuam hlawm thei dawn a ni.

Tun tum chu kan vengin lung lum kan tawrh vangin YMAAW pawhin helam kan hawi lo thei lo a ni e.

Article :**LUNG LUM KHA**

- R. Lalchhuanawma.

Kha mi tuk, Pathianni, Sept ni 2,2012 zinglam dar ruk pelh hreta Chaltlang kawngko chhaklam atanga Lung lian pui pui lo chim kha rapthlak tak a ni, 'an thawm mitdelte hriat khawpin' tih ang mai a nasa alawm mawle. Lung lian pui pui kawngahrawn tla in kawngpui a ping hmuk mai a, kawnga chawlhna hmun chang ve lo eng emaw zatte chu kan veng Chanmari West lamah a biling a balanga rawn zuangthla in Pu Rochharliana te In an rawn bitum a, anni chhungkaw zing mutui lai chu thawhphan awm hman hauh lovin a rawn kaitho phut mai, 'a tlak tlak vanduai' tih ang deuhin lung den fuh na lai apiang chu an sawp nulh mai, hliam tuar an awm lo hlauh kha a vanneihthlak takzet a ni. Pu Mosia, Pu BMA, Pu Sangtea te In leh Mizoram UPC Biakin hluite a suasam tel nual bawk.

Lung hi: A hmanna tur dik taka hman chuan lung hi an tangkai em em a, Step rem nan te, Lungrem mawi tak tak siam nan te leh Rora atan thleng a tangkai a ni a, Sinai tlang lung phei kha chu hruaitu Mosian Pathian hnen atanga a dawn Thupek Sawm record na'n a hmang hial a nih kha. Kha mi tuka lung lo lum thla zet erawh kha zawngin tangkaina an va han nei lo tehlu em, an tangkai lo ni mai lovin chhungkaw tam tak ti thlabartu leh vengchhung buaina thlentulek an ni zawk.

a nghawng kal zel: Thawhtan ni a Aizawl khawpui chhung Traffic Jam nasa lutuk kha kha lung lum vang vek kha a ni. Kha thil thleng khan paw nasa tak khawih mah sela, kawng lehlamah chuan Mizo tlawmngaihna lanchhuah tirtu, hawkdak satliah mai vang ni lova 'chhيات tawkte tan tangkaina ka nei dah law maw' ti a mipui kha ti zozai punkhawm tirtu, Disaster management lam hmalakna avanga tanpui ngaitanpuina tur sum leh pai tam tak ui hauh lova thawhkhawm tirtu leh MZP huaihawk Total Bandh meuh pawh pawisa hleithei lo khawpa a khawnawta hnatlan tir mup mup tu a ni lawi si. Chhiattawkte pawhin vanduwaina chungah lawmthu sawi tur an ngah ngawtin ka ring.

a behbawm: Thangsirapa Mai lum khan thil lum rau rau ah paw a khawih nep hmel deuh a, 'Inpui sakawl a zuane , hui ah...' tih vel kha a ni mai a, khatianga kha a tawk viau asin maw le.

Kha mi tuk lung lum zet kha chuan thawkkhat laia kan unau thenkhatte khawchhak lunglum hlau tlanchhiate pawh min ti hre chhuak rum rum mai. Kha mi ni tlai dar 4:00 vel khan Upa Rawna in bul atangin kan thlir a, khawl tam tak, JCB leh B lote hmangin kawng hnawhtu lungpui chhutkeh tumin an ri bur bur a, chutih lai tak chuan kawngko atanga lung lo tla leh in arbawm tiat aia lian zet tih hriat reng reng chu kawngthlang lamah a rawn dak zuau zuau a, a bu luk luk a, a rawn lum tlang dawn emaw kan tih laiin lum tlang lovin kawng sirah a inngat ta ruau mai, E khai! Lalpa zahngaihna ava nasa em, rawn lum tlang vaih sela chuh....!! Ring kham urh khawp a thlir reng tu Vanapa Section nuho pawh kha an fakawm narawh e, thlir mai loh kha chu tih theih dang nei chuang miao hek lo le.

a entir: Lung tam tak tangkai em em an awm laiin pawikhawihthu chu lung tlemte an ni a, kawng daltute phei chu hmanraw chi hrang hrang hmanga tih kehsawma thenfai nghal vek anni. Chutianga bawkin YMA member tam zawk tlawmngai tak tak leh khawtlang tana tangkai em em leh thlamuanpui tham an awm laiin mi tlemte kawhmawh bawl ching, khawtlang pawisawi, mi in dengchhetu leh kawng hnawhpungtu lung ang lek ho hi eng hmanraw hmang pawh a thenfai an ni zel ang. YMA-in "Khawtlang nun siamthat" kumpuanah kan hmang miao a.

2012 Thuvawn

*I awmdan tur chu
LALPA chungah ngat
la; Amah chu ring la,
aman a ti vek ang.*

CHAWNGBAWLA

✎ August Ni 25 a, **Sarah Fashion Drawing Competition** (YMA Chhang pual) tana buatsaih chu Pathian ni khan result puan a ni a, lawmman hi New Horizon School-ah sem a ni. Hetiang hi an result a ni; Kum 6 hnuai lamah 1st Zohmingsanga S/o Thanghmingliana, 2nd Murcus Malsawmzuala S/o Lalnunthara Sailo, 3rd Lalrindika S/o Vanlalisaka te an ni a, Kum 7 - 9 inkarah; 1st Lalremsiama S/o Thanghmingliana, 2nd B. Lalnunpuii D/o B. Lalrawngbawla, 3rd Lalhruaitluanga S/o Lalruata Hnamte an ni. Kum 10 - 14 inkarah 1st Lalrinawmi Ralte D/o Lalrawngbawla Ralte, 2nd Lalchhuanawma Khiangte S/o K. Lalthakima 3rd Lalmuanpuii D/o Lalchhandama Ralte an ni.

Lawmmanah hian Box tha tak sem a ni a, a sensote hi Pu Laldingliana'n a tum veka, section-in a chungah lawmthu a sawi.

✎ Lalrinthanga, Pu Lalchhandama Ralte fapa chu Civil Hospitalah a awm a, a dam leh thuai an duhsak hle.

✎ An member Pu Lalremsanga chuan Ni 6.9.2012 khan fanu a nei a, section chuan an lawmpui hle.

✎ Ni 2.9.2012 Chawlhni zingkar khan Chaltlang kham a lung lum chuan an section huamchhunga in pathum a deng chhia a, Pu Rochharliana In a deng chhe nasa ber a, Pu Lalbiakmawia Ralte leh UPC Biak In pawh a deng chhe nual baw, nunna chan leh hliam an awm lo chu lawmawm an ti hle.

✎ **Pu R. Rokima** chuan section thutthleng siam nan **Rs 20,000.00** a pe a, hetiang mi inphal an sectionin an nei hi an chhuangin, a chungah an lawm hle.

NEUVA

✎ Ni 8.9.2012 (Inrinni) zingkar khan Faina Hnatlang neih a ni a, member thawk chhuak zawng zawng chungah committee chuan lawmthu an sawi.

✎ Chhungtinte mahni in leh a vel vawng fai turin an inchah a, Bawlhhlawh paih motor-ah bawlhhlawh paih theuh ni se an ti.

✎ Leimin avang a chhiattawk chhungkua te an tawrhpu hle a, Ni 6.9.2012 (Nilaitawhtan) leh Ni 8.9.2012 (Inrinni) a nileng hnatlang a thawk chhuak section memberte chungah lawmthu an sawi.

✎ An hruaitu Pu Liansangpuia chuan fapa duhawm tak a nei thar a, an lawmpui hle.

VANAPA

✎ Veng chhunga leimin tuar chhungkuate an tawrhpu hle.

✎ Ni 6.9.2012 (Ninga) nia Buk extend hnatlang leh Ni 8.9.2012 (Inrinni) a section chhunga Faina Hnatlang neih an tum chu veng chhunga leimin a awm vanga chhiat taw kan awm avanga Branch YMA in member pum huapa hnatlang a koh avangin an thulh rih a, hun remchang hmasaah hnatlang hi koh leh mai tum a ni.

✎ YMA thutthleng thar 40 lai an siamtir mek.

✎ An member Pu Remsangpuia Damdawi ina awm chu dam takin a lo chhuak leh ta.

KHUANGCHERA

✎ Ni 12.9.2012 (nilaini) hian Doordarshan-ah Lengkhawm Zairecord tum ani a, nu leh pa leh YMA member hla zir thin zawng zawngte chungah lawmthu an sawi.

✎ Branch hnatlanga thawk chhuak thin member te chungah lawmthu an sawi. YMA hmalakna kawng hrang hranga thahnem ngai taka thawk chhuak zel turin an inchah.

✎ An member Gospel Camping-a lut zawng zawngte taksa leh thlarau siam tharna changa hlim taka an lo chhuah ngei an duhsak hle. Tin, la lut ve lote pawh lut theuh turin an insawm.

TAITESENA

✎ An hruaitu Tv H. Lalnunzira (Zirtea) chu Federation Qualifying Round khel turin Jamshedpur lamah a thang mek a, hlawhtlinna ropui tak nena a lo haw leh ngei an duhsak.

✎ Veng chhunga leimin tuar chhungkuate an tawrhpu hle. Leimin avanga hnatlanga thawk chhuak thin an member-te chungah lawmthu an sawi a, YMA hmalakna kawng hranga hranga taima leh zual turin an member-te an chah.

Thlanmual Sub-Committee

✎ Pu K Lalthakima CH Leader in Kuang Kross tur thingphel a zai sak leh a nawh mam sak avangin an lawm hle.

✎ An Committee member Tv Lalremruata N Section damlo pawh a dam that thuai an duh sak hle.

✎ Leimin avang a chhiat taw chhungkuate an tawrhpu hle.

FOOTBALL BOOT CHHAR

ZOFA CUP khelh ni 1.9.2012 (Inrinni) khan AR Lammual-ah Football Boot chhar a ni a, a tibo chuan Branch YMA Asst Secy, Tv Zairemmawia hnenah a awmdan chiang taka sawiin ngaihven theih a ni e.

HRIATTIRNA

YMA Park-ah zan riakin Motor dah phal a ni lo va, loh theih loh thil leh laklawh avanga dah turte chuan Branch emaw Section YMA hruaitute hnenah hriattir thin tur a ni e.

Secretary**Chanmari West Branch YMA****MHIP**

✎ Handloom Training Centre-chu MHIP Building hnuaiyah Ni 6.9.2012 khan sawn luh fel a ni ta. Hemi ni hian MHIP member-te leh Trainees te nen hnatlanga thawhho a ni a, tum khata sawn zawh theih a nih loh avangin Indoor Management ten an harsatnate hria a, dawhthei taka an ngah avangin an lawm hle.

✎ Pu Rochharliana te chhungkuain leimin avanga vanduaiana an tawk chu MHIP chuan pawh an tiin an tawrhpu hle. Disaster Management kaltlangin tanpuina Rs 1000/- an hlan baw.

✎ Hun remchang hmasa berah Executive Committee koh tum a ni.

ZOFA

✎ Ni 1.9.2012 (Inrinni) nileng khan ZOFA Cup-2012 AR Ground -ah an khel a, an hlimtlang hle. Hetiang hi result a ni:

1st - Chanmari West Branch KTP

2nd - ZOFA Cultural Club

3rd - Chanmari West Sporting Club

4th - Chanmari West Branch YMA

✎ Film channa tur hmunte endik (spot verification) turin Vice President Pu VL Thakima leh Asst Secretary R. Lalrinngeta te chu an zin chhuak mek.

✎ Film channa atana mamawh sam lem leh hmuihmul lemte Guwahati lam ami an chah mek.

✎ Ral lu Lam Documentary Film siam turin budget **Rs 2,70,500/-** an siam. He budget-ah hian a changtute hlawh tur a tel lova, a chang tur hian veng chhung mi, tlawmngai tura sawm a ni a. A tui mite tan tel theih reng a ni baw e. An budget hi a tam tham em avangin veng chhung mi, he lama tuite tan sponsorship leh tanpuina pek theih reng a ni a.

Lawmthu sawina

☞ Chaltlang kham lung lumin kan in leh lo min tih chhiat sak chungchangah kan in siamthat leh lei paih fai ngai paih a, Local Council hotute, Disaster management hruiute, YMA hruiute leh veng chhung mipui zawng zawngten a tul anga min thawh sak leh tanpuina min pek avangin in chungah lawmthu kan sawi tak meuh meuh a ni.

Chhiat tawk aiawhin:

1. Rochharliana
2. Mosia
3. Lalbiakmawia Ralte
4. T. Zorampela
5. Remsangpuia

☞ Ni 2.9.2012 zing kara Chaltlang kawng leimin leh lung lumin kan Biak in, Naupang Sande Sikul Hall a den chhiat chungchangah, veng chhung nu leh pa, YMA leh Local Council-te hmalaknaa tha taka min siam sak avangin lawmthu kan sawi e.

Upa R. Lalthlamuana
Chairman, Mizoram UPC,
Chanmari West

Pensioner lawmthu sawina

Pi Rintluangi leh a fate chuan an pa Pu Thansanga (RTS) hriatreng nan Steel almirah godrej ngat tha tak mai MCPA Chanmari West branch min pe a, an chhungkaw chungah Pensioner-te an lawm tak zet a ni.

SABLA

memberte hriat tur

Ni 15.9.2012 (Inrinni) khian Centre 1, 2 leh 3 -ah Sabla membortete hnenah buhfai sem tum a ni a, mahni centre-ah theuh lam tur a ni e.

Branch YMA Volleyball Playerte hriat tur

Wawiin Ni 9.9.2012 tlai dar 3:00-ah hian C.YMA Volleyball Tournamenta kan veng aiawh tura ruat zawng zawngte Pu C. Lalmuankima 'T' Inah kal khawm vek tur a ni.

ADVERTISEMENT

Mistiri bungrua chi hrang hrang:Heng- Electric Randa, Design Khawl, Istiri, Drilling Machine chhiate hi kan siam thei reng e. Engtiklaipawn pan theih reng kan ni.

Lalnunsanga
Phone No - 9862312242
(2-3) Neuva Section

Central YMA

☞ Ni 28.8.2012 - Charlie Hobbs, Research Scholar, Harvard University chuan YMA chianchin zirin Central YMA Office a tlawh a, Pu Lalbiakzuala leh Pu R. Lalnggheta ten an lo dawng sawng.

☞ Ni 28.8.2012 - Dr. Rameshwar Oraon, Chairman, National Commission for Schedule Tribes chu Pu Lalbiakzuala, Vice President, Pu Vanlalruata, Gen. Secretary leh Pu R. Lalnggheta, Treasurer ten a thlenna State Guest House-ah an hmu a, Autonomous District Council te Direct Funding chungchang an sawipui.

☞ Ni 5.9.2012 - Nagaland Baptist Church Council hruiute leh MPF hruiute Central YMA Office-ah an leng a, Inthlanpui neih laia YMA te hnathawh dan a hmunah anrawn zir a, CYMA OB ten an lo dawngsawng.

☞ Nimin Ni 8.9.2012 11:00am khan CEC an meeting a, Ni 12.9.2012 (Nilaini) hian CCC meeting leh a ni ang, Hetah hian YMA General Conference Agenda leh Kumpuan rawtna thlitfim a ni ang.

Hriattirna

Ni 23-25/10/2012 chhunga YMA General Conference Kawrtethawveng a neih turah kan Branch YMA atanga zai/lemchan hmanga item nei thei turte chuan Ni 9.9.2012 ral hmian Branch Secretary hnenah inhriattir tur a ni e.

Property Committee

☞ Kan veng chhung information mike chu a tha vek niin hriat a ni a, eng emaw avanga chhia a awm a nih chuan Property Committee hruiute hnenah hriattir tura ngen inni e.

SMS

SMS thawna tur : 9862358337.

☞ YMA leh Local Council member, Hnatlang kotu ni bawk si, member te'n hah taka han an thawhlaia chet ve tum miah lo, kut leh ke berh ve miah lova mi hnatlang thlir thin ka hmuh hian mak ka ti, a zahthlak tih an hre lo hi.....

8575675375

☞ Khawnvartui retailer kan nei ta lo em ni? Veng thenawmte chuan an sem thei reng mai si a.

9612735415

☞ Pasaltha Vrs Pasal tha kha Pu Hruaia VL ai chuan Pu Rintuia hian a inhmeah zawk lo maw ka ti leh deuh.

9615944205

SMS kan dawnte hi Editorial Board ngaihdan a ni vek kher lo.

FOOTBALL MANAGING BOARD

☞ 3rd Div. register player zawng zawngte Thawhtan zing dar 6:30-ah high field-ah kim taka kal khawm tur a ni e.

CHHUANAWM

Casio Music Corporation, India leh Music Home, Chanmari Aizawl-in kum 14-19 inkarte tana Casio Music Contest a buatsaihah kan veng tlangval R. Lalmuanpuia chuan **Lawmmna 1-na** a la a, lawmmanah hian digital piano CDP-120 a dawng.

Pu Darhunthanga leh Pi Lalhmingliani Sailo te fapa neihchhun R. Lalmuanpuia hi Ni 25.3.1994 ah a piang a, tunah hian Pachhunga University College-ah 1st BA a zir mek a ni. Tunah hian Khuangchera Sectionah an cheng mek a, hetiang mi kan vengin kan nei hi a chhuanawm tak zet a ni.

Bonanza Offer - Accent

Center for Development (A unit of IDEAS)

A Registered Vocational Training Provider (VTP) under the Dept of Labour & Employment, Govt of Mizoram and Ministry of Labour & Employment, Govt of India

Certificate in Computer Application Course (3 months)	You Get	Free 1 month Course in Soft Skills (Spoken English & Communication Skills, Personality Development, Job Interview Skills, Confidence Building Skills)
Diploma in Computer Application Course (6 months)	You Get	Free 3 month Course in Soft Skills (Spoken English & Communication Skills, Personality Development, Job Interview Skills, Confidence Building Skills)
Advanced Diploma in Computer Application Course (1 year)	You Get	Free 6 month Course in Soft Skills (Spoken English & Communication Skills, Personality Development, Job Interview Skills, Confidence Building Skills)
Diploma in Computer Hardware & Networking Course (6 months)	You Get	Free 3 month Course in Soft Skills (Spoken English & Communication Skills, Personality Development, Job Interview Skills, Confidence Building Skills)
Certificate in IT Security Course (2 months)	You Get	Free 1 month Course in Soft Skills (Spoken English & Communication Skills, Personality Development, Job Interview Skills, Confidence Building Skills)

* Class opens from 7:00am to 7:00pm (monday to friday)

Contact - ACCENT, Hranthanga Building, F-46, Lower Chanmari, Aizawl; Telephone No. 9615881958, 9862459649, 9774163484